

Kapiya Sën Paulus Kevu Vu Kerisi-yi-alam Vu Kolosi

¹ Sa Paulus sën Anutu ggooin sa raḡ in bë sa natu Kerisi Yesu yi sinarë lo. Alu hil arid Timoti

² kevu kapiya sënë yök vu Kerisi-yi-alam ham sën ham nedo Kolosi aga. Vu he arimin ham sën ham ayomin neya timu vu Kerisi yönon lo. Sa neḡetaḡ vu hil Amad Anutu in ham bë semu ham begevong ham ayomin gëp revuh.

Anutu Vong Balam Kolosi Ayoj Ya Timu Vu Kerisi

³ Alu kwamin vesa vu hil Mehöböp Yesu Kerisi Ama Anutu in ham neyoh vu buk pin sën alu najom raḡ in ham lo.

⁴⁻⁶ Yönon, he najom raḡ in ham rot loḡ buk sën he hangö ham bengömin bë ham ayomin neya timu vu Kerisi Yesu geham ahëmin neving Kerisi-yi-alam pin lo, rot besën verup gwëbeng. Ham ngo Bengö Nivesa yi gägek anon wirek, loḡ mëm ham raḡ ni bë ham rëḡ medo malamin-tumsën degwata gëp yaḡek. Bengö Nivesa saga ya meyoh vu nyëḡ pin, lob nevonḡ balam denesepa loḡ Kerisi. Lob töḡ verup vu ham ving, lob ham vonḡ ving besepa loḡ loḡ buk sën ham ngo müḡinsën berak ni bë Anutu yi gägek semusën yönon lo, rot beverup gwëbeng.

⁷ Epapras sën tahu ham loḡ Bengö Nivesa sënë beham raḡ ni lo, og yik mehö nivesa balu nehebë

loḵ ti in huk. Kerisi yi hur nivesa yi meneloḵ yah he bömin benevong yi huk ggöp ham nyög.

⁸ Loḵ mēm nēr ham bengömin yom vu he bē Anon Vabuung loḵ vu ham beham ahēmin neving Kerisi-yi-alam.

Paulus Jom Raḵ Bē Anutu Gadu Alam Kolosi

⁹ Epapras nēr gāgek yom vu he nebē saga, lob mēm alu najom raḵ in ham yoh vu buk pin gehe su nehevuu rē. Gaḵ alu neḵetag vu Anutu bē gevong beham natu alam los kwamin yönon, gAnon Vabuung tateḵin ham kwamin beham jaḵ ngaa pin ni nabē nivesa ma nipaya. In mēm ham jaḵ ngaa pin sēn Anutu ahē neving bē hil gevong lo ni.

¹⁰ Nabē sēnē, loḵ mēm ham yoh vu bē sepa doḵ Mehöböp yi aggata niröp bemēm kwa vesa in ham. Lob ham rēḵ gwevong ngaa nivesa jaḵ buk pin banon jaḵ, gemēm ham jaḵ Anutu ni gökin rot.

¹¹ Log alu najom raḵ in ham ving bē Anutu mehö niwëek ala los gayeheng bo niwëek vu ham rot in ham najom ham ahon beham kwerē maggin pin bebare los kwamin vesa

¹² begweḵo hil Amad arē jaḵ. In vong beham yoh vu bē doḵ na geving yi alam pin behil rēḵ medo doḵ yi Nyög-rangah-yi.

¹³ Yönon, ḵo hil vēr in malakenu niwëek, getung hil loḵ ya ving Nalu sēn ahē ving yi pangsen lo yi alam.

¹⁴ In Anutu Nalu bago hil yom ggovek ya be-dahun hil ngaa nipaya ya.

Kerisi Yi Aggata Los Yi Huk

¹⁵ Anutu Nalu yik luho Anutu sën hil su ayoh vu bē galē yi rē lo neggēp ti. Yō nedo nyēdahis betu ngāa pin sën Anutu tung agi ala.

¹⁶ Tung ngāa pin vu yagek gevu dob. Tung ngāa pin sën nedo hil malad agi, gengāa vahi sën hil su nehalē rē lo. Tung alam-los-bengōj, gegavman, geggev, galam sën denetu ala lo. Yōnon, tung ngāa pin sēnē bengāa pin yō tu yi ngāa.

¹⁷ Yō nedo nyēdahis gengāa la su nedo rē, log medo negin ngāa pin sën tung lo medenedo nivesa rak yō niwēek.

¹⁸ Kerisi-yi-alam pin detu degwa timu log tu hir yusekē. Yi mehō muginsën sën kedi rak yah ggēp bedub lo. Kedi rak in bē yō ti natu ngāa pin ala.

¹⁹ Anutu vongin bē luho Nalu gēp ti, om sën vong yi ngaanon vu yi beggērin ayo los dahis.

²⁰ Anutu vongin bē gevong mamer vu mehōnon los ngāa pin sën vu yagek los dob lo, in bē hil los medo jevuh ti. Om sën vong Nalu yam bediik rak kelepeko* loḷ yah hil bed in bē gagek nadiik na.

²¹ Wirek og ham tu alam bemēn in Anutu. Ham kwamin nevo ngāa nipaya mu menesepa loḷ, lob saga vong beham los Anutu nelē ham paya.

²² Rēk Kerisi diik loḷ yah ham bömin in bē ham los Anutu medo jevuh ti. Vong nebē sēnē in bē geḷo ham nah vu yi beham natu alam nimin rōp los alam nimin vesa gegagek su gēp vu ham gēp Anutu mala.

²³ Gaḷ ham ayomin na timu vu Kerisi beham bare niwēek ata. In ngāa ngwē rēk geḷo ham kwamin seggi lob tum ham rēk gwevu aggata sën ham vong ving niwēek rak Bengō Nivesa sën ham ngo lo na. Denēr Bengō Nivesa sēnē ya meyoh vu

mehönon pin vu dob, lob sa Paulus setu hur ving menanër ving.

Paulus Lok Vu Alam Kolosi

²⁴ Gwëbeng sënë sa hako maggin, rëk maggin sënë nelok vu ham om sa kwağ vesa. Log maggin sën sa nekerë lok sa naviğ agi, og sa nekerë lok yah Kerisi ben. Sa nekerë in bë dok vu Kerisi-yi-alam pin los dahis, om yik su sengo ti nekerë rë, gağ alu Kerisi nekerë lok ti.

²⁵ Lob Anutu yö ggooin sa rağ tu yi alam pin hir hur bevo huk lok sa nemağ bë sa nanër yi gagek pin vu ham.

²⁶ Gagek sënë yö neggëp vunsën in mehönon vu nyëğ pin wirek, beneggëp rot beberup gwëbeng. Rëk gwëbeng og tøk yam rangah vu Kerisi-yi-alam bederağ ni ggovek ya.

²⁷ Anutu yö kwa vo bë tatekin gagek vunsën sënë vu yi alam pin, besir sën yu-ngwë lo dejağ ni geving nabë gagek nivesa rot belos bengö. Gagek vunsën sënë nebë Kerisi nedo ving ham, lob ham nevo kwamin in yi bë geğo ham nah medo nivesa rot geving yi.

²⁸ Om sën he medo nanër Kerisi yi Bengö Nivesa rangah gehe nalev horek vu mehönon bë degegin sir nivesa. He netatekin gagek los kwa nivesa pin vu alam pin in bë gağo sir pin denah vu Kerisi medenatu yi alam niröp, gağ su demedo duğ duğ in ngaa ti.

²⁹ Nebë saga, om sën sa nehevong huk böp rot menavimengin, rëk Kerisi yö negadu sa menevong niwëëk vu sa.

2

Hil Gevong Geving Niwëek Genid Dëlin Gagek Kuungsën

¹ Yönon, sa bë ham jak ni nabë sa nehevong huk böp rot in bë sedok vu ham los alam Laodisea galam ngahisekë sën su malaj neraç sa malag rë lo.

² Sa nehevong huk böp sënë in bë ham bare niwëek los ahëmin nivesa, gesa nehevongin bë ham ahëmin geving ham, in saga rëk naduu ham ahon beham medo jevuh ti. Log sa hevongin bë ham jak gagek ni los degwa, bejak ni nabë gagek anon. Senër gagek sën netatekin Kerisi vu hil lo. In neggëp vunsën ving Anutu wirek, rëk tøk yam rangah gwëbeng beyoh vu bë gevong kwa nivesa rot vu ham.

³ Yönon, Anutu kwa pin los degwa geyi gagek los kwa böp böp pin neggëp vu Kerisi.

⁴ Senër gagek saga vu ham in bë mehöti su bo bël dok ham betetuhin ham.

⁵ Sa su nado ving ham rë, rëk sa kwag nevo ham rot bevong bë sën sa nado ving ham, lob sa kwag vesa in sën ham nedo revuh ti geham ayomin neya timu vu Kerisi lo.

Hil Aga Jak Kerisi In Hil Medo Malad-Tumsën Yönon

⁶ Ham ko Kerisi Yesu tu ham Mehöböp ggovek ya, om ham bare mena geving yi nabë saga.

⁷ Ham bare niwëek jak yi, nabë sën kele nare niwëek raç dob, genabë sën beggang nedo niwëek raç mudeng lo. He nër Bengö Nivesa vu ham, om ham gwevong geving niwëek bemëm rëk gadu

ham beham bare, lob ham kwamin vesa vu Anutu jak buk.

⁸ Ham gwegin ham. In rëk mehöti nanër gagek kwa dob yi mu benanër gagek meris vu ham bekekuung in ham begërin ham. Alam nebë sënë og denevengwëng rak alam böp wirek hen hir ngaa los ngaa dob sënë yi horek meris aggagga, gesu denevengwëng rak Kerisi rë.

⁹ Yesu og Anutu sogek, log Anutu Anon nedo loḵ yi beggërin yi los dahis.

¹⁰ Lob ham tu yi alam, om ggërin ham ving nebë saga beham su neraḵ vu in ngaanon ti rë. In yi yö tu ala bekesuu angër los arëj gengaahur böp böp pin.

¹¹ Lob ham su rah* navimin in bë ham natu Kerisi-yi-alam rë, gaḵ vong bë Kerisi rah* ham navimin vorot, rëk su rah ham rak nema rë. Gaḵ ham vuu ham ngaa mugeng ya gewërin ham yah vu Kerisi, lob saga nebë sën rah* ham navimin beham tu yi alam.

¹² Ham ripek bël, lob sënë tahu bë ham diik bedelev ham ya bedub ving yi. Log tahu ving bë ham kwedi rak ggökin, in ham vong ving bë Anutu og mehö niwëek meḵo Yesu vër in bedub benedo mala-tumsën.

¹³ Wirek ham nevong ngaa nipaya aggagga, geham nesepa loḵ ngaa kwa-mugeng-yi, lob sënë vong beham tu ngaa diiksën-yi in bë malamin nama. Rëk ma gAnutu kevoh ham ngaa nipaya ya, om rëk gevong behil medo malad-tumsën geving Kerisi.

¹⁴ Horek yi gagek vahi sën nevongin bë dahun hil lo neggëp vu hil, bevong bë hil rëk bare gagek,

rëk ma gAnutu kevoh ya. In sënë nebë sën tul brëm ya gagek sënë vetii kepeko* ving Yesu bepin maya.

¹⁵ Om angër los arëj gengaahur böp böp su arëj neggëp in bë hil nadudek vu sir rë. Gağ Yesu kesuu sir rak kepeko* betato rangah rak alam pin malaj bë detu ngaa meris benijwëek masën.

Yik Hil Nebë Sën Hil Adiik Ving Kerisi Ggovek Ya

¹⁶ Nebë saga, om nabë mehō la denanër ham in ngaa sën ham newa los nenum lo, gedenanër ham in ham su nesepa loğ hir buk aggagga sën detung yoh vu ta gekwev gesoda lo rë, og ham su gwebë nengamin vu sir.

¹⁷ In ngaa nebë sënë og yik ngaa sën rëk anon jağ vu tamusën lo yi tatusën mu. Gağ mëm Kerisi mu mëm yik ngaanon.

¹⁸ Om ham gwegin ham in alam sën denenër ngaa sën denelë loğ pesepsën lo. Geham gwegin ham in alam sën denedudek vu angër lu ngaa lo. In alam nebë saga og kwaj nevo ngaa dob yi bedenevongin bë degërin ham nah vu sir, geham su gwëko nyëvewen nivesa sën Kerisi bë gevong vu ham lo rë. Gağ yö devongin bë degeko sir jağ mu,

¹⁹ gesu denepiik vu Kerisi sën tu hil yud lo rë. Yōnon, hil pedus los telitek nevo niwëek yoh vu hil anod geneduu hil ahon. Rëk mu hil yud og negin hil anod los dahis nivesa in bë hil ajig benid wëek jağ noh vu Anutu kwa. Lob Kerisi yik nebë hil sën Kerisi-yi-alam hil lo yud.

²⁰ Vong bë ham diik ving Kerisi, lob ham vuu dob sënë yi ngaa meris meris ya. Rëk nebë va sën ham

nevong ngaa nebë alam-dob-yi-ë? In ham nesepa lok Horek ggökin nebë,

²¹ “Su genajom ngaa sënë; su gegwa ngaa saga; su gwebë nemam jak ngaa sënë!”

²² Horek nebë sënë og nenër rak ngaa sën hil aga bemala nama na verök yi lo. In horek nebë sënë og mehönon yö hir gagek mu, gak su ngaanon rë.

²³ Yönon, mak hil rëk gekuung nabë horek nebë sënë og nivesa los kwa. In gejiin hil bë hil ana soda los raro lu ngaa, gedenenër bë hil ngo dahun hil gehil ngo basap hil navid besu gegin nivesa rë. Rëk ma, gengaa nebë sënë og su yoh vu bë dok vu hil yönon rë, in hil ayod mak nahën nevu nevu in ngaa nipaya behil nesepa lok.

3

Yik Hil Nebë Sën Hil Kedi Rak Yah Ving Kerisi

¹ Nabë ham kwedi rak yah ving Kerisi, og ham malamin sepa ngaa sën nedo vavunë vu nyëg sën Kerisi tu Mehö-los-bengö menedo Anutu nema vesa lo mu.

² Ham kwamin bo ngaa-vavunë-yi noh vu buk, gak ham su medo mekwamin bo ngaa-dob-yi.

³ In Kerisi diik lok yah ham bömin lob saga vong bë ham diik ya, rëk ma geham rëk medo malamin-tumsën geving Anutu.

⁴ Lom sën hil kedi jak bemedo malad-tumsën lo, og degwa yö vu Kerisi, om yö rëk natök rangah vu tamusën, lob vu buk saga ham rëk kwedi geving yi beberup los vunek vunek yagek yi.

Hil Natu Mehönon Mewis

⁵ Nebë saga om ham gwevuu ngaa-dob-yi sën neggëp loḵ ham ayomin lo pin na. Ngaa-dob-yi sagi nebë: Baggëb aggagga pin, ngaa ningöhek sën su yoh vu bë hil gevong rè lo, gengaa nipaya sën hil ayod neggurek in lo, gengaa nipaya sën hil malad anon in lo. In sënë og nebë sën hil nesepa loḵ anutu-kuungsën.

⁶ Alam sën denevong ngaa nebë agi, og Anutu rëḵ gevong nipaya nyëvewen doḵ nah vu sir.

⁷ Wirek ham newa rak alam nebë sënë, beham nevong ngaa pin sënë ving.

⁸ Rëḵ mu gwëbeng sënë og ham gwevuu ngaa nebë sënë pin na. Ham su gwelë mehönnon paya, ham su gwevong paang, ham su ahëmin sengën, ham su nanër pelësën, geham su gwevong nevu-min.

⁹ Ham su dah gägek vun genanër gägek kuungsën vu ham. In ham vuu ngaa mugeng ya, beham su nesepa loḵ yah rè.

¹⁰ Ham tu mehönnon mewis rak ggovek ya. Yönon, Anutu semu ham beham tu mehönnon mewis rak, lob nevo kwa vu ham yoh vu buk in bë ham rëḵ nabë yi.

¹¹ Hil atu mewis, om hil su basuh hil nabë: Sireḵ alam-yu-ngwë gehileḵ alam Yuda. Genabë, hileḵ neherah* navid, gesireḵ su denerah* navij rè. Gehil su nanër alam vahi nabë: Sir sagi og alam bemën, gesir saga og alam dug dug, galam sënëḵ detu ngaa meris, galam sagak yö denegin sir. Ma! Gaḵ yik Kerisi nevong balam pin neggëp ti geKerisi nedo loḵ alam pin neggëp ti.

Hil Sepa Doḵ Aggata Sën Hil Ahëd Geving Hil

¹² Anutu ggooin ham rak ggovek ya beham tu yi alam, lob ahë neving ham. Nebë saga, om ham sepa dok ngaa nabë sënë: Ham kwamin gevongin alam pin mesemu sir. Ham dahun ham, geham nahubin mehõnon geyik maam degevonḡ paya vu ham.

¹³ Ham su ahëmin sengën vu arimin sën Kerisi-yi-alam sir lo pevis rë, gaḡ ham ahëmin geving sir beham najom ham ahon. Lob nabë gagek neggëp vu ham ti in ari vonḡ paya vu yi, og maam gelë ari mu gedahun ari yi nipaya na. In Mehõbõp kevoh ham ngaa nipaya ya, om ham gwevonḡ nabë saga vu arimin lo.

¹⁴ Log sën hil ahëd geving hil lo, og sënë kesuu ngaa vahi pin, beneduu ngaa nivesa pin revuh ti. Om ham sepa dok ngaa pin sën aga, beham ahëmin geving ham pangsën kesuu ngaa vahi.

¹⁵ Lob Kerisi gevong beham ayomin geto revuh, lob sënë yõ gëgin ham rot. In Anutu tahi ham in bë ham natu degwa timu gayomin gëp revuh, geham kwamin vesa vu Anutu noh vu buk.

¹⁶ Lob Kerisi yi gagek napup ham ayomin rot, bemëm ham rëḡ medo nivesa menatu alam los kwamin. Log ham tateḡin gagek vu ham, bebarah ham verõḡ jak. Ham ayomin nivesa vu Anutu megwevonḡ sengii jak arë los gwevonḡ tarot sën neḡo arë rak loḡ ayo peggo lo, geham gwevonḡ raro megweḡo arë jak.

¹⁷ Log ngaa pin sën ham nenër lo gengaa pin sën ham nevonḡ lo, og ham gwevonḡ in geḡo Mehõbõp Yesu arë jak, in yõ tateḡin aggata, om ham nah vu hil Amad Anutu menanër kwamin vesasën vu yi.

Gagek Rak Maluh Los Venëj Genaluj Lo

18 Ham avëh, ham gurek reggamin babuj, in Mehöböp nelë sënë bë yohvu.

19 Log ham maluh! Ham ahëmin geving ham venëmin, beham su bo maggin vu sir.

20 Log ham hurmahen, ham nengamin yes vu amamin lu atamin in ngaa pin, in mëm Mehöböp gelë ham nivesa.

21 Log ham sën amaj ham lo, ham su gwevong paya vu nalumin ayoj bahëj sengën jak, in rëk ayoj maggin jak bedegöneng.

Gagek Rak Hur Los Ggev

22 Log ham sën hur lo, ham gwebë nengamin vu ham alamin hir gagek. Ham su gwevong huk jak malaj mu in nabë kwaj vesa in ham. Gak ham gönengin Mehöböp, geham ayomin na niröp vu huk.

23 Gengaa pin sën ham gwevong lo, og ham ayomin na timu vu beham gwevong niwëëk. In ham su nevong huk vu mehönon mu rë, gak ham nevong vu Mehöböp.

24 Om Mehöböp yö rëk bo dok nah beham gweko nyëvewen sën ggoin rak vu ham lo. In ham tu Mehöböp Kerisi yi hur.

25 Gak mehö sën nabë gevong paya lo, og rëk geko nyëvewen jak ngaa nipaya sën nevong lo. In hil su ayoh vu bë gevong bAnutu gurek hil babud rë.

4

1 Log ham sën tu ala menegin hur lo, ham gw- evong ngaa nivesa los nohvu vu sir niröp. In ham Mehöböp nedo yagek beyi hur ham ving.

Hil Najom Jak Vu Anutu Los Ayod Timu

² Ham najom jak los ayomin timu, geham su nimin tebö. Ham kwamin sepa beham najom jak los kwamin vesa vu Anutu.

³ Log ham najom jak vu Anutu in he geving nabë tatekin aggata vu he, in he nanër yi gägek rangah betatekin Kerisi degwa sën neggëp vunsën wirek rëk mëm tök yam rangah gwëbeng agi. Yönon, deko sa yam karabus in sa nanër gägek sënë,

⁴ om ham najom jak in sa nabë sa tatekin nivesa begëp rangah noh vu huk sën Anutu vo vu sa lo.

⁵ Ham gwevong ngaa nivesa los kwamin jak alam dahis malaj, log nabë aggata neggëp in bë ham nanër Bengö Nivesa vu sir, og ham su nimin tebö.

⁶ Ham nanër gägek malangeri los nivesa vu sir noh vu buk, log ham kwamin bo sir ti ti nabë denedo nebë va og ham nanër gägek niröp bedok vu sir.

Paulus Vong Tukikus Luho Onesimus Deya

⁷ Tukikus mëm rëk nanër huk sën sa nehevong lo bengö vu ham. Hil arid anon Tukikus. Sahëg neving yi balu nesepa he menehevong Mehöböp yi huk, lob nelok vu sa rot gesu nitebö rë.

⁸ Sa hevong yi yök vu ham rak degwa sënë, in bë ham jak he huk ni, gegevong beham ayomin niwëek jak.

⁹ Lob sa hevong Onesimus yök ving yi. Ham ngo ham alam ti yi yönon, in yi vu Kolosi behil arid anon yi, gehil ahëd neving yi. Lob luho rëk denanër ngaa sën anon rak ggëp agi vu ham.

Paulus Kevu Bë Kwa Nevo Alam Kolosi

¹⁰ Aristarkus yam karabus ving sa, lob kwa nevo ham menenër. GeMarkus sën Barnabas gadë lo kwa nevo ham menenër ving. Sën sa kevu wirek vu ham lo bë: Nabë nök berup vu ham, og ham gweko yi jak.

¹¹ Log Yesu Yustus kwa nevo ham ving menenër. Yik alam Yuda löö mu sagi sën denevong huk ving sa behe nehevong Anutu yi huk, in bë yi nyëg anon jak. Lööho sënë denegadu sa rot.

¹² Log ham mehö Kolosi ngwë sën Epapras lo kwa nevo ham ving menenër. Kerisi Yesu yi hur yi, log nejom rak in ham yoh vu buk. Nejom rak vu Anutu bë ham bare nimin wëëk nabë maluh, beham jak Anutu kwa ni, besepa doḵ noh vu buk pin.

¹³ Seraḵ ni ggovek ya, om sën senër bë nevong huk böp rot in bë doḵ vu ham gedoḵ vu alam Laodisea los alam Hirapolis geving.

¹⁴ Hil dokta Lukas sën hil ahëd neving yi lo, luho Demas kwaj nevo ham ving bedenenër.

¹⁵ Log ham nanër sa vu hil arid lo sën denedo Laodisea agu nabë sa kwag nevo sir ving menanër. Geham nanër vu Numpa lo sho Kerisi-yi-alam sën denesupin sir medenejom rak loḵ yi beggang lo geving.

¹⁶ Ham natevin ḵapiya sënë govek log ham gw-evong na vu Kerisi-yi-alam vu Laodisea bedenat-evin geving. Geḵapiya sën sa kevu ya vu Kerisi-yi-alam vu Laodisea lo, og ham natevin geving.

¹⁷ Geham gwevong gagek sënë na vu Arkipus nabë kwa bo huk sën Mehöböḵ vo loḵ nema lo, begevong niwëëk banon jak.

¹⁸ Sa Paulus sengo ɣevu gagek dus teka sagi raɣ
nemaɣ bë sa kwaɣ nevo ham. Ham kwamin bo
sa in sengo nahën nado ɣarabus los sêng. Anutu
gevong semusën vu ham.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023

18a972db-abcc-5dc3-9031-f1d4455b33c3